

POESIE SCELTE

tratte dal volume edito "Muddicheddi"

A SALEMI

O paiseddu, muntagnedda duci
c'hai l'aria frisca, li ciuriddi beddi.
Sta turri chi s'affaccia, chi straluci
ridi a li casi. Cantanu l'aceddi.

L'arba supra li vitri si spicchìa,
la terra di rusella già s'appara.
Lu celu, assunnateddu la talia
Canta lu addu e astuta la puddara.

Nova 'nsilenziu posa la natura,
rapi l'ucchiuzzi la gentili aurora.
La notti cu li stiddi s'innamura,
spunta lu sulì, varda anticchia fora.

Scruscinu li cianciani di luntanu,
lu carru è comu 'na parata d'oru.
Camina lu cavaddu chianu chianu,
li zzotti cu li petri fannu coru.

Cilia lu nidu e sveghia 'nna vanedda.
Lesta 'na scupa scrusci 'nta la strata.
Ardi lu furnu, nozzulu e spinedda,
scardannu l'aria cu la so' vampata.

Lu pani biancu d'oru si culura.
Lu ciavuru si spanni pi la via.
Rusidda stanca addenta 'na cuddura,
un gattu lestu sata e miaulia.

Tra l'astracheddi e li finestri chiusi,
tremanu panni bianchi nicareddi.
L'aria chi curri porta 'mpituusi
ciavuru d'erva, menta, alufareddi.

Sona lu matutinu 'na campana,
l'ecu rispunni, lu ventu suspira.
Scurri sbrizziannu acqua 'na funtana,
lu viddaneddu lu mulu abbivira.

L'omu si scoti e scorda la so pena.
Lu paiseddu canta 'na canzuna,
e li casuzzi chi si tennu appena
si strincinu, pi darisi vasuna.

‘NTA ‘NA STRATUZZA

‘Nta ‘na stratuzza funna e silinziusa
c’è sciamu di picciotti ed alligria;
lu suli scinni a fari assemi un gnocu,
s’assetta a lu bastiuni e li talia.

Un picciriddu, lu chiù granniceddu,
porta comu un tesoru un aquiluni,
tanti culura appisi a un pizziteddu
agghiummuniatu di russu cuttuni.

Lu cielu di la strata è troppu nicu,
pi putiri iucari cu la stidda.
Lu sciamu sturdi, na porta si rapi,
affaccia cu la scupa la za Pidda
e manna li picciotti chiù luntanu.

Ridi lu munnu a di cori cuntenti.
L’occhi lucenti, li facci addumati,
curri un canuzzu, abbaia pi nenti,
va appressu a li picciotti scarmanati
chi vannu versu fora lu paisi.

Ora lu suli tuttu sta curcatu
supra lu viridi c’abbrazza la chiana.
Vola la stidda, lu lazzu camina,
nmezzu lu celu c’è un ciuri c’acchiana.

Na nuvola di velu e di puntina
tratteni un angileddu chi la chiama.

LU ME PAISI

‘Mperi, la vecchia turri scrafucchiata
sciogghi cu orgogliu ‘na banneru.
A la Matrici la funtana ridi,
lu chianu tuttu ‘ntornu è ‘na lumera
di sulì e cordi e bianchi panni stisi.

Iocanu a lu ventu e s’addinocchianu
linzola, cammiseddi, falariddi
davanti a la suvrana Chiesa Matri
dunni timuri e fidi, comu rosi,
spampinanu spiranzi e sentimenti
di vita stintatedda a ogni scaluni.

Un paiseddu vivu, arracciatu
supra ‘na muntagnedda di culuri,
di storia e viridi tuttu accarizziatu.

Scunfittu e assicutatu lu Burbuni,
la prima dittatura pruclamata
di Garibaldi assemi a li Picciotti,
Salemi, frac e tuba, l’ha firmata.

La vecchia turri antica e sapientuna,
ricorda iorna e figghi littirati
e sarva libbra di filusufia
e scrivi ‘nnomi pi tutti li strati.
Sta muntagnedda è la terra mia
profumata di fidi e puisia.

'NA NOTTI DI CHIUMMU

'Na notti di chiummu
stizziata di stiddi
tampasia pi li strati.
'Nsunnatu lu silenziu,
tagghia feddi scurusi di vaneddi.
Spiranzi allicinuti 'nta lu cori,
di 'ddi pinzeri viridi,
s'annacanu a lu ventu,
supra 'ntinni d'affetti.
Occhi luntani vardanu
lu tettu di 'na casa
'ntilarata di lacrimi e di risa.
'Nnucenza viva, estati trapassata.
Lu ventu arruzzulia la megghiu vita,
dintra 'na lanna vecchia ammattucata.
Scruscinu l'anni e comu chiummu pisanu
li peni e li pinzeri.

CENA DI SAN GIUSEPPI

Salemi è lu caru meu paisi
chi di peni cunfusu, p'ogni mali
prumetti cu fidi a San Giuseppi
nna cena fulcuristica spiciali.
Votu pussenti, sia pi malatia
o pi disgrazii, o peni di lu cori;
votu chi tra prieri, genti pia
dumanna grazii cu fedu c'un mori.
Pani di San Giuseppi, scartucciatu,
fraganti, biancu, tantu sapuritu,
lucenti d'ovu, d'oru mpaniddu,
di ciuri e giuggiulena rifinutu;
la parma, lu vastuni, u cucciddu
pari scurpitu d'un artista anticu
cu stili di valuri assai prigiatu,
battutu, adaciu, cun marteddu nicu.
Archetti viridi, a forma di cappella,
d'addavuru e appisi lumiuna,
aranci, cudduredda, lumincella,
rametti di piridda, favi, pruna.
Rappuliddi di scura racina,
fatti di pasta bianca e vinu cottu,
cannistreddi di frutta miscati
fatti di pasta chi pari viscottu.
Tra siti antichi e cutri risplendenti
copri la mensa tila arricchimata;
lu vinu odura mmezzu la lattuca
chiusa comu na rosa ncappucciata.
Nta sferi di cristallu trasparenti
li pisciteddi d'oru macchittati,

dintra dd'acqua chi luci, lenti lenti
s'affannanu a firriari senza ciatu.
Tri picciriddi stannu mpersunannu
San Giuseppi, la Madonna, lu Bamminu;
s'assettanu a nna tavula riali,
lu pranzu scurri tra lu ncenzu e vinu.
Gustusi e vari sunnu li pitanzi
preparati cu amuri pirsunali:
fritturi, pisci, dolci, ova, sustanzi,
piatta di maccarruna triunfali.
Sarvietti bianchi, tessuti di casa,
li megghiu piatta cu pasta cunzata,
si mannanu a li amici e a li vicini
pi cummitalli a dda cena sacrata.
La sira passa lesta in armonia;
passanu ogni tantu li bicchera
e accupagnata di li sunatura
s'intona la gluriusa litania.
Cena di San Giuseppi, fidi, oduri,
di grazii, di fulcluri tramannatu,
di genti timurata chi cu amuri
lu santu mastriceddu unn'ha scurdatu.